

江西詩徵

江西詩徵卷四

南城曾煥賓谷繩軒

唐

陳貺

貺南閩人後隱廬山元宗聘至獻景陽臺懷古詩
授以官固辭仍遣還

景陽臺懷古

景陽六朝地運極自依依一會皆同是到頭誰論非酒濃
沈遠慮花好失前機見此尤宜戒正當家國肥

江爲

爲宋州人避亂入廬山師陳貺爲詩

旅懷

迢迢江漢路秋色又堪驚
半夜聞鴻雁多年別弟兄
高風雲影斷微雨菊花明
欲寄東歸信裏回無限情

江行

越信隔年稀孤舟幾夢歸
月寒花露重江晚水煙微
峰直帆相望沙空鳥自飛
何時洞庭上春雨滿蓑衣

登澗州城

天末江城晚登臨客望迷
春潮平島嶼殘雨隔虹霓
鳥與孤帆遠煙和獨樹低
鄉山何處是目斷廣陵西

岳陽樓

倚樓高望極展轉念前途
晚葉紅殘楚秋江碧入吳
雲中

來雁急天末去帆孤明月誰同我悠悠上帝都

送客

明月孤舟遠吟髭鑷更華天形固澤國秋色露人家水館
螢交影霜洲櫓委花何當尋舊隱泉石好生涯

劉洞

洞廬陵人隱居廬山南唐後主召獻詩百篇有夜
坐詩見稱時號劉夜坐

石城懷古

石城古岸頭一望思悠悠幾許六朝事不禁江水流

伍喬

喬潯陽人讀書廬山國學南唐時舉進士第一仕

至考功員外郎

冬日道中

去去天涯無定期，瘦童羸馬共依依。
暮煙江口客來絕，寒葉嶺頭人住稀。
帶雪野風吹旅思，入雲山火照行衣。
釣臺吟閣滄洲在，應爲初心未得歸。

僻居酬友人

僻居雖愛近林泉，幽徑閑居碧蘚連。
向竹掩扉隨鶴息，就溪安石學僧禪。
古琴帶月音聲亮，山果經霜氣味全。
多謝故交憐朴野，隔雲時復寄佳篇。

遊西山龍泉寺

疊巘層峰坐可觀，沈門流水更潺湲。
曉鐘聲徹洞溪遠，夏

木影籠軒檻寒幽徑乍尋衣履潤古堂頻宿夢魂安因嗟
城郭營營事不得長遊空髮殘

宿濤山

一入仙山萬慮寬夜深寧厭倚虛欄鶴和雲影宿高木人
帶月光登古壇芝朮露濃溪塢白薜蘿風起殿廊寒更陪
羽客論真理不覺初鐘叩曉殘

遊西禪

遠岫當軒列翠光高僧一衲萬緣忘碧松影裏地長潤白
藕花中水亦香雲自雨前生淨石鶴于鐘後宿長廊遊人
戀此吟終日盛暑樓臺早有涼

寄史處士

長羨閑居一水湄
吟情高古有誰知
石樓待月橫琴久
漁浦經風下釣遲
僻塢落花多掩徑
舊山殘燒幾侵籬
松門別後無消息
早晚重應躡屐隨

僻居秋思寄友人

門巷秋歸更寂寥
雨餘閑砌委蘭苗
夢迴月夜蟲吟壁
病起茅齋藥滿瓢
澤國舊遊關遠思
竹林前會負佳招
身名未立猶辛苦
何許流年晚鬢凋

寄落星史虛白處士

白雲峰下古溪頭
曾與提壺爛熳遊
登閣共看彭蠡水
圍爐相憶杜陵秋
碁元不厭通高品
句妙多容隔歲酬
別後相思時一望
暮山空碧水空流

九江旅夜寄山中故人

弱柳風高遠漏沈坐來難便息愁吟江城雪盡寒猶在客
舍燈孤夜正深塵土積年粘旅服關山無處寄歸心此時
遙羨閑眠侶靜掩雲扉臥一林

聞杜牧赴闕

舊隱匡廬一草堂今聞攜策謁吾皇峽雲難卷從龍勢古
劍終騰出土光開翅定期歸碧落濯纓寧肯問滄浪他時
得意交知仰莫忘裁詩寄釣鄉

題西林寺水閣

竹翠苔花遶檻濃此亭幽致詎曾逢水分林下清冷派山
峙雲間峭峻峯怪石夜光寒射燭老杉秋韻冷和鐘不知

來往留題客誰約重尋蓮社蹤

林居喜崔三博遠至

幾日區區在遠程晚烟林徑喜相迎
姿容雖有塵中色巾屨猶多嶽上情
野石靜排爲坐榻溪茶深煮當飛觥
留連話與方經宿又欲攜書別我行

觀華夷圖

別手應難及此精須知攢簇自心靈
始于毫末分諸國漸見圖中列四溟
關路欲伸通楚勢蜀山俄聳入秦青
筆端盡現寰區事堪把長懸在戶庭

廬山書堂送祝秀才還鄉

束書辭我下重巔相送同臨楚岸邊
歸思幾隨千里水離

情空寄一枝蟬園林到日酒初熟庭戶開時月正圓莫使
蹉跎戀踈野男兒酬志在當年

暮冬送何秀才毘陵

疋馬嘶風去思長素琴孤劍稱戎裝路塗多是過殘歲杯
酒無辭到醉鄉雲傍水村凝冷片雪連山驛積寒光毘陵
城下饒嘉景回日新詩應滿堂

龍潭張道者

碧洞幽巖獨息心時人何路得相尋養生不說憑諸藥適
意惟聞在一琴石徑掃稀山蘚合竹軒開晚野雲深他年
功就期飛去應笑吾徒多苦吟

晚秋同何秀才溪上

閑步秋光思杳然荷蓑因共過林煙期收野藥尋幽路欲
採溪菱上小船雲吐晚陰藏霽岫柳含餘靄叫殘蟬倒尊
盡日忘歸處山磬數聲敲暝天

陳陶

陶字嵩伯鄱陽人大中時遊學長安南唐昇元中
隱洪州西山後不知所終

塞下曲

邊頭能走馬援臂李將軍射虎羣羌伏開弓絕塞聞海山
諸向背攻守別風雲只爲坑降罪非輕車未轉勲

悲哉行

中嶽仇先生遺余何松方服之一千日肢體生異香步履

如風旋天涯不齊糧仍云爲地仙不得朝虛皇狡兔有三
穴人生又何常悲哉二廉士餓死於首陽

塗山懷古

落拓書劍晚清秋鴈正籠塗山間來上敬愛如登龍覽古
覺神王翛然天地空東南更何有一醉先王風惟昔放勳
世陰晦徹成洪皇圖化魚鱉天道漂無蹤帝乃命舟楫掇
芳儒素中高陳九州力百道驅歸東舊物復光明洪爐再
埏鎔經門不私子足知天下公亮曰那並生唐虞禪華蟲
茲山朝萬國一賦寰海同十載有區寓秋毫皆帝功垂衣
不驕德子桀如何聲握髮聞禮賢葺茅見卑宮比天色難
事神聖安能恭迺隱三千年遺芳播笙鏞當時執圭處佳

氣仍童童海嶼儼清廟天人盛祇供元恩及花木丹識名
崆峒異代草澤臣何由樹勲庸堯階未曾識誰信平生忠
恨不當際會預爲執鞭僮勞歌下山去懷德心無窮

遊子吟

栖鳥喜林曙驚蓬傷歲闕關河三尺雪何處是天山朔風
無重衣僕馬飢且寒慘慙別妻子遲回出門難男兒值休
明豈是長泥蟠何者爲木偶何人侍金鑾鬱鬱守貧賤悠
悠亦無端進不圖功名退不處巖巒窮通在何日光景如
跳丸富貴苦不早令人摧心肝誓期春之陽一振摩霄翰

懷仙吟二首

丹陵五牙客昨日羅浮歸赤斧尋不得煙霞空滿衣試於

華陽問果遇三茅知採藥向十洲同行牧羊兒十洲隔八
海浩渺不可期空留雙白鶴巢在長松枝

雲溪古流水春晚桃花香憶與我師別片帆歸滄浪滄浪
在何許相思淚如雨黃鶴不復來雲深離別處石渠泉冷
冷三見菖蒲生日夜勞夢魂隨波注東溟空懷別時惠長
讀消磨經

海昌望月

何處無今夕豈期在海頭賈客不愛月嬋娟閑滄洲浩然
傷歲華獨望湖邊樓煙鳥青歷歷藍田白悠悠誰無破鏡
期繫我信虛舟誰無桂枝念繫我方摧鞠始見彎環春又
逢團圓秋莫厭綾扇夕百年多銀鈎金盤誰雕鐫玉窟難

冥搜重輪運時節三五不自由疑拋雲上鍋欲撈天邊球
孀居應寒冷擣藥青冥愁兔子樹下蹲蝦蟆池中遊如何
名金波不共水東流天花辟臙腥野雲無邊陬蚌蛤乘大
運含珠相對醅夜鵲思南鄉露華清東甌百寶安可覩老
龍鑠深湫究究如情人盜者卽仇讐海涯上皎潔九門更
清幽亭亭勸金尊夜久喘吳牛夷俗皆輕擲北山思今遊
雁聲故鄉來客淚墮南洲平生煙霞志讀書覓封侯四海
尙白身豈無故鄉羞塋坎何足歎壯如水中虬獵獵谷底
蘭搖搖波上鷗中途喪資斧兩地生繁憂一杯太陰君鷁
鷁豈無求明日將片葉三山東南浮

蒲門戍觀海作

廓落溟漲曉蒲門鬱蒼蒼登樓禮東君旭日生扶桑毫釐
見蓬瀛含吐金銀光草木露未晞蜃樓氣若藏欲遊蟠桃
國慮涉魑魅鄉徐市惑秦朝何人在巖廊惜哉千童子葵
骨於渺茫恭聞槎客言東池接天潢卽此聘牛女曰祈長
壽方靈津水清淺余亦慕修航

番禺道中作

博羅程遠近海塞愁先入瘴雨出虹蜺蠻江渡山急常聞
島夷俗犀象滿城邑鴈至草猶春潮迴檣半濕丹邱鳳凰
隱水廟蛟龍集何處樹能言幾鄉珠是泣千年趙佗國霸
氣委原隰讎讎笑終軍長纓禍先及

贈江西周大夫

否極生大賢九元降靈氣獨立正始風蔚然中興瑞淵淪
照三古磊落涵涇渭真貌月懸秋雄詞雷出地具瞻先皇
寵欲踐東華貴咫尺時不來千秋萬劫湖淚因分三輔職進
領南平位報政黃霸慙提兵呂蒙醉歲星臨斗牛水國嘉
祥至不獨蒼生蘇仍兼六騶喜恭聞廟堂畧欲斷匈奴臂
剗釋自宸衷平戎在連帥時康簪笏冗世梗忠良議邱壑
非無人松香有私志三朝倚天劍十萬浮雲騎可使河曲
清羣公信兒戲滄溟用謙德百谷走童稚禦衆付深入參
籌須偉器他年蓬華賤願附鷁鸞翅

旅次銅山途中先寄溫州韓使君

亂山滄海曲中有橫陽道束馬過銅梁荏華坐堪老鳩鳴

高崖裂熊門深樹倒絕壑無坤維重林失蒼昊躋攀寡儔
侶扶接念與阜俯仰慄嵌空無因掇靈草梯窮聞戍鼓魂
續賴邱禱敞豁天地歸紫紆村落好悠悠思蔣徑擾擾愧
商皓馳想永嘉侯應傷此懷抱

種蘭

種蘭幽谷底四遠聞馨香春風長養深枝葉趁人長智水
潤其根仁鋤護其芳蒿藜不生地惡烏弓已藏椒桂夾四
隅茅茨居中央左鄰桃花塢右接蓮子塘一月薰手足兩
月薰衣裳三月薰肌骨四月薰心腸幽人飢如何採蘭充
餽糧幽人渴如何醞蘭爲酒漿地無青苗租白日如散王
不嘗仙人藥端坐紅霞房日夕望美人佩花正煌煌美人

久不來佩花徒生光刈穫及蒺藜無令見雪霜清芬信神
鬼一葉豈可忘舉頭愧青天鼓腹詠時康下有賢公卿上
有聖明王無堦荅風雨願獻蘭一筐

草木言

何生我蒼蒼何育我黃黃草木無知識幸君同三光始自
受姓名蒺藜立衣裳山河旣分麗齊首乳青陽甘辛各有
榮好醜不相防常憂刀斧劫竊慕仁壽鄉願天雨無暴願
地風無狂雨足因衰憊風多因天傷在山不爲桂徒辱君
高岡在水不爲蓮徒占君深塘勿輕培塿阜或有奇棟梁
勿輕蒙隴澤或有奇馨香涓毫可麗差朝菌壽爲長臃腫
若無取大椿命爲傷嬰沙不材生苒苒向秋荒幸遭薰風

自有得皆簸揚所愧雨露恩願效幽微芳希若頻採擇勿
使枯雪霜

題僧院紫竹

喜遊蛟井寺復見炎州竹杳靄萬丈間嘯風清獨速江南
正霜霰吐秀弄顚顛似瑞驚堅貞如魔試金粟笋非孝子
泣文異湘靈哭金碧誰與鄰蕭森自成族新聞赤帝種子
落毛人谷遠祖賜鵠鵬遺芳遍南陸對煙蘇麻醜夾澗貧
簪伏美譽動丹青瓊姿豔秦蜀因緣鹿苑識想像虵邱斲
幾葉別黃茅何年依白足龍樹蟄一花砌瑤掃雲屋色靜
曼仙花名高給孤獨青葱太子樹灑落觀音目法雨每霑
濡玉毫時照燭離居鸞節變住冷金顏縮豈念葛陂榮幸

無祖父辱光攝水精串影送蓮花軸江鷺日相尋野鶚時
寄宿幽香入茶竈靜翠直碁局寫羨垣上蒿自多籬下菊
從來道生一況伴龜藏六棲託詎星廻檀欒已雲蘊霞杯
傳縹葉羽管吹紫玉久絕釣竿歌聊栽竹枝曲媿生黃金
地千秋爲師綠

早發始興

雲裏山已曙舟中火初熱綠浦待行橈元媛催落月沿流
信多美况復秋風發挂席借前期晨雞莫嘲嗜

寄元孚道人

梵宇章句客佩蘭三十年長乘碧雲馬時策翰林鞭羃事
五岳遊金衣曳祥煙高攀桐君手左倚鸞鷟肩哭玉秋雨

中摘星春風前橫斡截洪偃憑几見廣宣爾來寤華胥石
壁孤雲眠龍降始得偈龜老方巢蓮內殿無文僧騶虞誰
能牽因之問楚水弔屈幾潺湲

宿島徑夷山舍

百里遵島徑蓬征信邇廻
暝依漁樵宿似過黃金臺
缺齧心未理寥寥夜援哀
山深石牀冷海近腥氣來
主人意不淺屢獻流霞杯
對月撫長劍愁襟紛莫開
九衢平如水胡爲陟崔嵬
一飯未遑飽鵬圖信悠哉
山濤譴細君吾豈厭蓬萊
明發要驅馬客思一徘徊

避世翁

海上一簑笠終年垂釣絲
滄洲有深意冠蓋何由知
直鉤

不營魚蠃室無妻兒渴飲寒泉水飢餐紫朮芝鶴髮披兩
肩高懷如澄陂嘗聞仙老言云是古鳴夷石竇閔雷雨金
潭養蛟螭乘槎上玉津騎鹿遊我崑以人爲語默與世爲
雄雌茲焉乃磻溪豹變應須時自古隱淪客非無王者師
西川座上聽金五雲唱歌

蜀王殿上華筵開五雲歌從天上來滿堂羅綺悄無語煥
音止駐雲裘回管絃金石還依轉不隨歌出靈和殿白雪
飄飄席上聞貫珠歷歷聲中見舊樣釵篸淺澹衣元和梳
洗青黛眉低叢小鬢膩髮髻碧牙鏤掌山參差曲終暫起
更衣過還向南行座頭坐低眉欲語謝貴侯檀臉雙雙淚
穿破自言本是宮中嬪武皇改號承恩新中丞御史不足

比中丞御史皆當時官中歌者

水殿一聲愁殺人武皇歸闕登真錄嬪

御蒙恩免幽辱茂陵弓劍不得親嫁與卑官到西蜀卑官
到官年未周堂衡祿罷東西遊蜀江水急駐不得復此萍
蓬二十秋今朝得侍王侯宴不覺途中妾身賤願持卮酒
更唱歌歌是伊州第三遍唱著右丞征戍詞更聞閨月添
相思如今聲韻尙如在何況官中年少時五雲處處可憐
許明朝道向褒中去須臾宴罷各東西雨散雲飛莫知處

飛龍引

有熊之君好神仙
食霞鍊石三千年
一旦黃龍下九天
騎龍枿枿昇紫煙
萬姓攀髯髯墮地
啼呼弓劍飄寒水
紫鸞八九墮玉笙
金鏡空留照魑魅
羽幢襍銀漢
秋六宮望

斷芙蓉愁應龍下揮中園笑泓泓水遶青苔洲瑞風颯遶
天光淺瑤闕峩峩露橫苑沆漭樓頭紫鳳歌三株樹下青
牛飯鴻臚九闕相玉皇鈞天樂引金華郎散花童子鶴衣
短投壺姹女蛾眉長彤庭侍宴瑤池席老兔春高桂宮白
蓬萊下國賜分珪阿母金桃容小摘仙流萬緘蟲篆春三
十六洞交風雲千年小兆一蟬蛻丹臺職亞扶桑君金烏
試浴青門水下界蜉蝣幾迴死

謫仙詞

牧龍丈人病高秋羣童擊節星漢愁瑤臺鳳輦不勝恨太
古一聲龍白頭玉氣蘭光久摧折上清難大音書絕蜺旌
失手遠於天三島空雲對秋月人間磊磊浮漚客鸞鷺蜻

蜨飛自隔不應冠
益逐黃埃長夢真
君舊恩深

步虛引

小隱山人十洲客
莓苔爲衣雙耳白
青編爲我忽降書
暮雨虹蜺一千尺
赤城門閉六丁直
曉日已燒東海色
朝天半夜聞玉雞
星斗離離礙龍翼

獨揺手

漢宮新燕矜蛾眉
春臺豔妝蓮一枝
迎春侍宴瑤池游
龍七盤嬌欲飛
冶袖鶯鶯拂朝曦
摩煙裏雪金碧遺
愁鴻連翮蠶曳絲
颯逕明珠掌中移
仙人龍鳳雲雨吹
朝哀暮愁引啞伊
鴛鴦翡翠承宴私
南山一笑君無辭
仙蛾泣月清露垂
六宮燒燭愁風欹

空城雀

古城濛濛花覆水昔日住人今住鬼野雀荒臺遺子孫千
年飲啄枯桑根不隨海燕栢梁去應無玉環銜報恩近村
紅栗香壓枝嗷嗷黃口訴朝飢生來未見鳳皇語欲飛常
怕蜘蛛絲斷腸四隅天四絕清泉綠蒿無恐疑

雞鳴曲

雞聲春曉上林中一聲驚落蝦蟇宮二聲喚破枕邊夢三
聲行人煙海紅平旦慵將百繾語遑繇錦繡當陽處媿君
飲食長相呼爲君晝鳴下高樹

小笛美

一尺玲瓏握中翠仙娥月浦呼龍子五夜流珠榮夢卿九

青鸞倚洪崖醉丹穴飢兒笑風雨媧皇碧玉星星語蛇蝎
愁聞骨髓寒江山恨老眠秋霧綺席鴛鴦冷朱翠星流露
泣誰驅使江南一曲罷伶倫芙蓉水殿春風起

將進酒

金尊莫倚青春健醜醜浮生如走電琴瑟盤傾從世珠黃
泥局瀉流年箭麻姑爪秃瞳子昏東皇肉角生魚鱗靈鼈
柱骨半枯朽驪龍德悔愁耕人周孔著龜久淪沒黃蒿誰
認賢愚骨兔苑詞才去不還蘭亭水石空明月姮娥弄蕭
香雨收江濱迸瑟魚龍愁靈芝九折楚蓮醉翾風一歎梁
庭秋醪亞蠻觥奉君壽玉山三獻春紅透銀鴨金鵝言待
誰隋家歡漬皇家有珊瑚座上凌香雲鳳臙龍炙猩猩脣

芝蘭此日不傾倒南山白石皆賢人文康調笑麒麟起一曲飛龍壽天地

錢塘對酒曲

風天雁悲西陵愁使君紅旗弄濤頭東海神魚騎未得江天大笑閑悠悠嗟峨吳山莫誇碧河陽經年一宵白南州彩鳳爲君生古獄愁蛇待恩澤三清羽童來何遲十二玉樓胡蝶飛炎荒翡翠九門去遼東白鶴無歸期鴟夷公子休悲悄六鼇如鏡天始老尊前事去月團圓琥珀無情憶蘇小

巫山高

玉峰青雲十二枝金母和雲賜瑤姬花宮磊砢楚宮外列

仙八面星斗垂秀色無雙怨三峽春風幾夢裏玉猿青鸞
不在嬾吹簫斑竹題詩寄江妾飄飄絲散巴子天苔裳玉
纓紅霞幡歸時白帝掩青瑣瓊枝草草遺湘煙

贈別離

碧王飛天星墜地玉劍分風交合水楊柳聽歌莫向隅雞
鳴一石留髡醉輪蹄送客清
水東月娥揮手崦嵫峰蠻天
列嶂儼相待風官掃道迎遊
龍天姥翦霞鋪曉空滌滌大
帝開明宮文鯨掉尾四海通
分明瀑布收靈桐山妖水魃
騎旋風燈夢留魂黃瘴中借
君朗鑒入崆峒靈光草照閑
花紅

關山月

昔年嫫姚護羌月今照嫫姚雙鬢雪青塚曾無尺寸歸錦
書多寄窮荒骨白戰金鎗體沙磧鄉心一片懸秋碧漢地
應啼破鏡時邊塵萬里嬋娟隔度磧衝雲朔風起邊笳欲
晚生青耳隴上橫吹霜色刀何年斷得匈奴臂

殿前生桂樹

仙娥玉宮秋夜明桂枝拂檻參差瓊香風下天漏丁丁牛
渚翠梁橫淺清羽帳不眠恨吹笙棲鳥暗驚仙子落步月
綦雲墮金雀蕙樓涼簟翠波空銀縷香寒鳳皇薄東海卽
爲郎斟酌綺疏長懸七星杓

古鏡篇

紫皇玉鏡蟾蜍宇墮地千年光不死發匣身沉古井寒懸

臺日照秋成水滌戶山窗幾梳綰菱花開落何人見野老
曾耕太白星神狐夜哭秋天片下國青銅旋磨滅迴鸞萬
影成枯骨會待搏風雨次寥長恐莓苔蝕明月

自歸山

海嶽南歸遠天門北望深暫爲青瑣客難換白雲心富貴
老閑事猿猴思舊林清平無樂志尊酒有瑤琴

渡浙江

適越一輕艘凌兢截鷺濤曙光金海近晴雪玉峰高靜寇
思投筆傷時欲釣鼉壯心殊未展登涉漫勞勞

清源途中旅思

古木閩州道驅羸落照間投村礙野水問店隔荒山身事

幾時了蓬飄何日閑看花滯南國鄉月十彎環

送沈次魯南遊

高臺贈君別滿握軒轅風落日一揮手金鵝雲雨空鰲洲
石梁外劍浦羅浮東茲興不可接脩脩煙際鴻

題居上人法華新院

浮名深般若方寺設蓮華鐘唄成僧國湖山稱法家一塵
多寶塔千佛大牛車能誘泥犁客超然識聚沙

送秦鍊師

紫府靜沈沈松軒思別吟水流寧有意雲從本無心錦洞
桃花遠青山竹葉深不因時賣藥何路更相尋

贈別

海國一尺綺冰壺萬縷絲以君西攀桂贈此金蓮枝高鳥
思茂林窮魚樂洿池平生握中寶無使歲寒移

贈容南韋中丞

晉寧都護軍威重九驛梯航壓要津十二銅魚尊畫戟三
千犀甲擁朱輪風雲已靜西山寇閭井全移上國春不獨
來蘇發歌詠天涯半是泣珠人

豫章江樓望西山有懷

水護星壇列太虛煙霓十八上仙居時人未識遼東鶴吾
祖曾傳寶鼎書終日章江催白鬢何年丹竈見紅蕖桃花
谷口春深淺欲訪先生赤鯉魚

經徐穉墓

郊郛妖興炎漢衰先生南國臥明夷鳳皇屢降元纁禮瓊
石終藏烈火詩禁掖衣冠加宋鵲湖山耕釣沒堯時千年
壟樹何人哭寂寞蒼苔內史碑

鍾陵道中作

原隰經霜蕙草黃塞鴻消息怨流芳秋山落照見麋鹿南
國異花開雪霜煙火近通槃瓠俗水雲深入武陵鄉曾逢
齧缺話東海長憶蕭家青玉牀

旅泊塗江

煙雨南江一葉微松潭漁父夜相依斷沙鴈起金精出孤
嶺猿愁木客歸楚國柑橙勞夢想丹陵霞鶴聞音嶽無因
得似滄溟叟始憶離巢已倦飛

上建溪

崆峒一派瀉蒼煙長揖丹邱逐水仙雲樹杳冥通上界峰
巒廻台下閩川侵星愁過蛟龍國採碧時逢婺女船已判
猿催髻先白幾重灘瀨在秋天

題贈高閑上人

蘆荀花間客軒轅席上珍筆江秋菡萏僧國瑞麒麟殿
初招隱曹溪得後塵龍蛇驚粉署花雨對金輪白馬方依
漢朱星又入秦劇談凌鑿齒清論倒波旬拂石先天古降
龍舊國春珠還合浦老龍去玉州貧鴛鴦輸黃絹場壇遶
白蘋問湖閑入夢金閣靜通神海氣成方丈山泉落淨巾
獼猴深愛月鷗鳥不猜人拂岳蕭蕭竹垂空澹澹津漢珠

難覓對荆璞本來真伊傳多聯壁劉雷競買鄰江邊有國
寶時爲刷星辰

哭王贊府

白水流今古青山送死生驅馳三楚掾倏忽一空名金玉
埋臯壤芝蘭哭弟兄龍頭孤後進鵬翅失前程愁變風雲
色悲連鼓角聲落星辭聖代寒夢閉佳城伊昔來江邑從
容副國英德踰棲棘美公亞飲冰大廈亡孤直羣儒憶
老成白駒悲里巷梁木慟簪纓隴遂添新草珠還滿舊簾
蒼蒼難可問原上晚煙橫

聖帝擊壤歌四十聲

百六承堯緒艱難土運昌太虛橫慧宇中野門豺狼帝曰

更吾嗣時哉憶聖唐英星垂將校神嶽誕忠良鍊石醫元
氣屠鼉正昊蒼掃原鋪一德驅禳立三光大道重蘇息真
風再發揚芟夷踰舊跡神聖掩前王郊酒酣寥廓鴻恩受
渺茫地圖龜負出天誥鳳銜將雜貢來山峙羣夷入鴈行
紫泥搜海岱鴻筆富巖廊鷹象敷宸極寰瀛作瑞坊泥丸
封八表金鏡照中央構殿基麟趾開藩表鳳翔鑾輿親稼
穡朱幌務蠶桑戎羯輸天馬靈仙侍玉房宮儀水精甲門
衛綠沈槍陶鑄超三古車書混萬方時巡望虞舜蒐狩法
殷湯化合謳謠滿年豐鬼蜮藏政源歸牧馬公法付神羊
寶鼎無靈應金甌肯破傷封山昭茂績祠執荅嘉祥在昔
宮闈僭仍罹昇沉殃牝雞何敢講獬犬漫劾勦苗禱三靈

怒桓偷九族亡鯨鯢尋挂網魍魎旋投荒松栢霜逾翠芝
蘭露更香聖謨流祚遠仙系發源長島嶼征徭薄漪瀾杭
稻涼鳧魚饕餮啖荷薜足衣裳寤寐華胥國嬉遊太素鄉
鴈鷗飛接翼忠孝住連牆有叟能調鼎無媒隱釣璜乾坤
資識量江海入文章野鶴思蓬闕山麋憶廟堂泥沙空淬
礪星斗屢低昂歷草何因見衢尊豈誓忘終隨嘉橘賦霄
漢謁羲皇

續古二十九首

大堯登寶位麟鳳煥宸居海曲霑恩澤還生比目魚
生值批邇歷長歌東南春釣鼈年三十未見天子巡
軒轅承化日羣鳳戲池臺大樸衰喪後仲尼生不來

大道歸孟門蕭蘭日爭長想得巢居時碧江應無浪
屹屹蓬舍下慕君麒麟閣笑殺王子喬寥天乘白鶴
杳杳巫峽雲悠悠漢江水愁殺幾少年春風相憶地
吳洲采芳客桂棹木蘭船日晚欲有寄裴回春風前
仙家風景晏浮世年華速邂逅漢武時蟠桃海東熟
南國珊瑚樹好栽天馬鞭魚龍不解語海曲空殢娟
周穆恣遊幸橫天驅八龍寧知泰山下日日望登封
秦國饒羅網中原絕麟鳳萬乘巡海回鮑魚空相送
秦家無廟畧遮虜續長城萬姓隴頭死中原荊棘生
秦作東海橋中州鬼辛苦縱得跨蓬萊羣仙亦飛去
隋煬棄中國龍舟巡海涯春風廣陵苑不見秦宮花

范子相句踐滅吳成大勲雖然五湖去終媿磻溪雲
麟鳳識翔螭聖賢明卷舒哀哉嵇叔夜智不及鸚鵡
戰地三尺骨將軍一身貴自古若弔冤落花少於淚
楚國千里早上龍日已多九穀竟枯死好雲閑嵯峨
漢家三殿色恩澤若飄風今日黃金屋明朝長信宮
南園杏花發北渚梅花落吳女妬西施容華日消鑠
山雞理毛羽自言勝烏鳶一朝逢鸞鴛羞死南海邊
秦家卷衣貴本是倡家子金殿一承恩貂蟬滿鄉里
魏宮薛家女秀色傾三殿武帝鼎湖歸一身似秋扇
嬋娟越機裏織得雙棲鳳慰此殊世花金梭忽停弄
學古三十載猶依白雲居每覽班超傳令人慚讀書

雄劍久濩落夜吟秋風起不是懶爲龍此非延平水
朝爲楊柳色暮作芙蓉好春風若有情江山相逐老
景龍臨太極五鳳當庭舞誰信壁間梭昇天作雲雨
曾夢諸侯笑康因議脫枷千根池底藕一朶火中花

永嘉贈別

芳草溫陽客歸心浙水西臨風青桂檝幾日白蘋溪
有所思

欲唱元雲曲知音誰復是採掇情未來臨池畫春水
吳苑思

今人地藏古人骨古人花爲今人發江南何處葬西施謝
豹空聞采香月

古意

麻姑井邊一株杏花開不如古時紅西鄰蔡家十歲女年
年二月賣東風

宿天竺寺

一宵何期此靈境五粒松香金地冷西僧示我高隱心月
在中峰葛洪井

賦得古蓮塘

闔閭宮娃能采蓮明珠作佩龍爲船三千巧笑不復見江
頭廢苑花年年

春日行

鷓鴣初鳴洲渚滿龍蛇洗鱗春水暖病多欲問山寺僧湖

上人傳石橋斷

蜀葵詠

綠衣宛地紅倡倡
熏風似舞諸女郎
南鄰蕩子婦無賴
錦機春夜成文章

子規思

春山杜鵑來幾日
夜啼南家復北家
野人聽此坐惆悵
恐畏踏落東園花

吳興秋思二首

不是茗溪厭看月
天涯有程雲樹涼
何意汀洲剩風雨
白蘋今日似瀟湘

日夕鯢魚夢南國
茗陽水高迷渡頭
故山秋風憶歸去
白

雲又被王孫留

竹

不厭東溪綠玉君
天壇雙鳳有時聞
一峰曉似朝仙處
青節森森倚絳雲

萬枝朝露學瀟湘
杳靄孤亭白石涼
誰道垂龍不行雨
春雷入地馬鞭狂

嘯入新篁一里行
萬竿如籥鎖龍泓
驚巢翡翠無尋處
閑倚雲根刻姓名

青嵐帶亞思吾祖
綠潤偏多憶蔡邕
長聽南園風雨夜
恐生鱗甲盡爲龍

迸玉閑抽上釣磯
翠苗番次脫霞衣
山童泥乞青鸞騎

過春泉掣手飛

燕燕雖時紫米香野溪羞色過東牆諸兒莫拘成蹊荀從
結高籠養鳳皇

一節呼龍萬里秋數壑垂海六鼇愁更須瀑布峰前種雲
裡闌干過子猷

邱壑誰堪話碧鮮靜尋春譜認嬋娟會當小殺青瑤簡圖
寫龜魚把上天

元圃千春閉玉叢湛陽一祖碧雲空不須騷屑愁江島今
日南枝在國風

鍾陵秋夜

洪崖嶺上秋月明野客枕底章江清蓬壺空闕不可夢一

一入樓歸雁聲

水調詞

點虜迢迢未肯和五陵年少重橫戈誰家不結空閨恨玉
筋闌干妾最多

羽管慵調怨別離西園新月伴愁眉容華不分隨年去獨
有妝樓明鏡知

水閣蓮開燕引雛朝朝攀折望金吾聞道磧西春不到花
時還憶故園無

自從清野戍遼東舞袖香銷羅幌空幾度長安發梅柳節
旄零落不成功

長夜孤眠倦錦衾秦樓霜月苦邊心征衣一倍裝綿厚猶

慮交河雪凍深

沙塞依稀落日邊
寒宵魂夢怯山川
離居漸覺笙歌懶
君逐嫖姚已十年

萬里輪臺音信稀
傳聞移帳護金徽
會須麟閣留蹤跡
不斬天驕莫議歸

閑居雜興

虞韶九奏音猶在
只是巴童自棄遺
閑臥清秋憶師曠
好風搖動古松枝

一顧成周力有餘
白雲閑釣五溪魚
中原莫道無麟鳳
自是皇家結網疎

長愛真人王子喬
五松山月伴吹簫
從他浮世悲生死
獨

駕蒼鱗入九霄

越里娃童錦作襦
豔歌聲壓郢中姝
無人說向張京兆
一曲江南十斛珠

雲堆西望賊連營
分閫何當舉義兵
莫道羔裘無壯節
古來成事盡書生

泉州刺桐花詠

海曲春深滿郡霞
越人多種刺桐花
可憐虎竹西樓色
錦帳三千阿母家

不勝攀折恨年華
紅樹南看見天涯
故國春風歸去盡
何人堪寄一枝花

赤帝常聞海上遊
三千幢蓋擁炎州
今來樹似離宮色
紅

翠斜欹十二樓

投贈福建桂常侍

後來台席更何人都護朝天拜近臣
長笑當時漢卿士等閒恩澤畫麒麟

匝地歌鐘鎮海隅城池鞅掌舊名都
不知珠履三千外更許侯嬴寄食無

隴西行四首

漢主東封報太平無人金闕議邊兵
縱饒奪得林胡塞磧地桑麻種不生

誓掃匈奴不顧身五千貂錦喪胡塵
可憐無定河邊骨猶是春閨夢裡人

隴戍三看塞草青樓煩新替護羌兵同來死者傷離別一
夜孤魂哭舊營

黠虜生擒未有涯黑山營陣識龍蛇自從貴主和親後一
半邊風似漢家

荅蓮花妓

近來詩思清於水老去風情薄似雲已向昇天得門戶錦
衾深愧卓文君

酬元亨上人

一衲淨居雲夢合秋來詩思祝融高何日知我津涯闊遠
寄東溟六巨鼈

題徐暉湖亭

伏龍山橫洲渚地人如白蘋自生死洪崖成道二千年唯
有徐君播青史

徐鉉

鉉字鼎臣本廣陵人仕楊吳爲校書郎入南唐試
知制誥禮部侍郎歷尙書右丞歸宋爲太子率更
令坐貶卒歸葬南昌之西山有集

早春左省寓直

旭景鸞臺上微雲象闕間時清政事少日永直官閑遠籟
飛簫管零冰響珮環終軍年二十默坐叩元關

寒食宿陳公塘上

垂楊界官道茅屋倚高坡月下春塘水風中牧豎歌折花

閑立久對酒遠情多今夜孤亭夢悠揚奈爾何

京口江際弄水

退公求靜獨臨川楊子江南二月天百尺翠屏甘露閣數
帆晴日海門船波澄瀨石寒如玉草接汀蘋綠似煙安得
乘槎更東去十洲風外弄潺湲

送史館高員外使嶺南

東觀時閑暇還修喻蜀書雙旌馳縣道百越從輶車桂蠹
晨餐罷食泉訪古初春江多好景莫使醉吟踈

賦得有所思

所思何在杳難尋路遠山長水復深衰草滿庭空佇立清
風吹袂更長吟忘情好醉青田酒寄恨宜調綠綺琴落日

鮮雲偏聚散可能知我獨傷心

和殷舍人蕭員外春雪

萬里春陰乍履端廣庭風起玉塵乾
梅花嶺上連天白蕙草堦前特地寒
晴去便爲經歲別興來何惜徹宵看
此時鴛侶皆閑暇贈答詩成禁漏殘

秋日雨中與蕭贊善訪殷舍人於翰林座中作

野出西垣步步遲秋光如水雨如絲
銅龍樓下逢閑客紅藥堦前訪舊知
亂點乍滋承露處碎聲因想滴蓬時
銀臺鑰入須歸去不惜餘歡盡酒卮

送和州張員外爲江都令

經年相望隔重湖一旦相逢在上都
塞詔官班聊慰否埋

輪意氣尙存無由來聖代憐才子始覺清風激懦夫若向
西岡尋勝賞舊題名處爲躊躇

寒食日作

厨冷煙初禁門閑日更斜東風不好事吹落滿庭花過社
紛紛鶯新晴淡淡霞京都盛游觀誰訪子雲家

寄撫州鍾郎中

時王師敗績於
閩中謨在建州

去載分襟後尋聞在建安封疆正多事尊俎若爲歡都護
空遺鏃明君欲舞干繞朝時不用非是殺身難

秋日廬龍村舍

置却人間事閑從野老游樹聲村店晚草色古城秋獨鳥
飛天外閑雲度隴頭姓名君莫問山木與虛舟

送郝郎中爲浙西判官

大藩從事本優賢幕府仍當北固前
花繞樓臺山倚郭寺臨江海水連天
恐君到卽忘歸日憶我遊曾歷二年
若許他時作閑伴殷勤爲買釣魚船

柳枝辭

濛濛堤畔柳含煙疑是陽和二月天
醉裏不知時節改漫隨兒女打鞦韆

暫別揚州十度春不知光景屬何人
一帆歸客千條柳腸斷東風揚子津

亞元舍人不替深知猥貽佳作三篇
清絕不敢輕酬因爲長歌聊以爲報未
竟復得子喬校書示問故兼

寄陳君庶資一笑耳

海陵城裏春正月海畔朝陽照殘雪城中有客獨登樓遙
望天邊白銀闕白銀闕下何英英雕鞍繡轂趨承明闔門
曉闕旌旗影玉墀風細佩環聲此處追飛皆俊彥當年何
事容疵賤懷鉛晝坐紫微宮焚香夜直明光殿王言簡靜
官司閑朋好殷勤多往還新亭風景如東洛卽嶺林泉似
北山光陰暗度盃盃裏職業未妨談笑間有時邀賓復攜
妓造門不問都非是酣歌叫笑驚四鄰賦筆縱橫動千字
任他銀箭轉更籌不怕金吾司夜吏可憐諸貴賢且才時
情物望兩無猜伊余獨稟狂狷性褊量多言仍薄命吞舟
可漏豈無恩負乘自貽非不幸一朝削跡爲遷客旦暮寄

雲千里隔離鴻別雁各分飛折柳攀花兩無色盧龍渡口
問迷津瓜步山前送暮春白沙江上曾行路青林花落何
紛紛漢皇昔幸回中道極目牛羊臥芳草舊宅重游盡隙
荒故人相見多衰老禪智寺山光橋風瑟瑟兮雨蕭蕭行
盃已醒殘夢斷征途未極離魂消海陵郡中陶太守相逢
本是隨行舊乍申拜起已開眉却問辛勤還執手精廬水
榭最清幽一稅征車聊駐留閉門思過謝來客知恩省分
寬離憂郡齋勝境有後池山亭茵閣互參差有時虛左來
相召舉白飛觴任所爲多才太守能搗鼓醉送金船間歌
舞酒酣耳熱眼生花暫似京華歡會處歸來旅館還端居
清風朗月夜窓虛鬢鬢流景歲云暮天涯望斷故人書春

來憑檻方歎息仰頭忽見南來翼足繫紅箋墮我前引頸
長鳴如有言開緘試讀相思字乃是多情喬亞元短韻三
篇皆麗絕小梅寄意情偏切金蘭投分一何堅銀鈎置袖
終難滅醉後狂言何足竒感君知已不相遺長卿曾作美
人賦元成今有責躬詩報章欲託還京信筆拙紙窮情未
盡珍重芸香陳子喬亦解貽書遠相問寧須買藥療羈愁
只恨無書消鄙吝游處當時靡不同歡娛今日雨成空天
子尙應憐賈誼時人未要嘲楊雄曲終筆閣緘封已翩翩
驛騎行塵起寄向中朝謝故人爲說相思意如此

送荻栽與秀才朱觀

羨子清吟處茅齋面碧流解憎蓮艷俗唯欠荻花幽鷺立

低枝晚風驚折葉秋贈君須種取不必樹忘憂

移饒州別周使君

正憐東道感賢侯何幸南冠脫楚囚
皖伯臺前收別宴喬公亭下艤行舟
四年去國身將老百郡徵兵主尙憂
更向鄱陽湖上去青衫憔悴淚交流

酬郭先輩

太原郭夫子行高文炳蔚弱齡負世譽
一舉游月窟仙籍第三人時人故稱屈
昔余吏西省傾蓋名籍籍及我竄羣
舒向風心鬱鬱歸來暮江上雲霧一披拂
雷雨不下施猶作池中物念君介然氣
感時思奮發示我數篇文與古爭
馳笑綠褥粲英華理深刮肌骨古詩尤
精奧史論皆宏拔

舉此措諸民何憂民不活吁嗟吾道薄與世長迂闊顧我
徒有心數竒身正絀論兵屬少年經國須儒術夫子無自
輕蒼生正愁疾

送劉山陽

舊族知名士朱衣宰楚城所嗟吾道薄豈是主恩輕戰鼓
何時息儒冠獨自行此心多感激相送若爲情

送從兄赴臨川幕

梁王籍寵就東藩還召鄒枚坐兔園今日好論天下事昔
年同受主人恩石頭城下春潮滿金柅亭邊綠樹繁唯有
音書慰離別一盃相送別無言

送興員外赴江州幕

煩君更上築金臺。世難民勞藉俊才。自有聲名馳羽檄，不妨談笑奉尊罍。元規樓迴清風滿，匡俗山春畫障開。莫忘故人離別恨，海潮迴處寄書來。

再領制誥和王明府見和

蹇步還依列宿邊，拱辰重認舊雲天。自嗟多難飄零困，不似當年膽氣全。雞樹晚花疎向日，龍池輕浪細含煙。從來不解爲身計，一葉悠悠任大川。

奉命南使經彭澤

遠使程途未一分，離心常要醉醺醺。那堪彭澤門前立，黃菊蕭疎不見君。

玉笥山留題

仙鄉會應遠王事知何極征傳莫辭勞玉峰聊一息形骸
已銷散心想都凝寂真氣自清虛非關好松石丸仙皆積
學洞壑多遺跡游子歸去來胡爲但征役

和歙州陳使君見寄

新安風景好時令肅轅門身貴心彌下功多口不言韜鈴
家法在儒雅素風存簪履陪游盛鄉閭俗化敦臨窓山色
秀繞郭水聲喧織絡文章麗矜嚴道義尊樓臺秋月靜京
庾晚雲屯曉吹傳衙鼓晴陽展信旂一篇貽友好千里倍
心論未見歸驂動空能役夢魂

和門下殷侍郎新茶二十韻

暖吹八春園新芽競粲然才教鷹鶩折未放雪花妍荷杖

青林下攜筐旭景前採茶須在日未出前孕靈資雨露鍾秀自山川

碾後香彌遠烹來色更鮮名隨土地貴味逐水泉遷力藉

流黃暖形模紫筍圓美者有圓捲紫筍正當鑽柳火遙想湧金泉

湯美茶山有金沙泉修貢時出任道時新物須依古法煎輕甌浮綠乳孤

竈散餘煙甘薺非予匹宮槐讓我先槐芽亦可為茶竹孤空冉冉

荷弱謾田田解渴消殘酒清神感夜眠十漿何足饋百榼

盡堪捐采擷唯憂晚營求不計錢任公因焙顯陸氏有經

傳愛甚真成癖嘗多合得仙亭臺虛靜處風月艷陽天自

可臨泉石何妨雜管弦東山似蒙頂願得從諸賢

白題山亭

小舫行乘月高齋臥看山退公聊自足爭敢望長閑

跂石仍臨水披襟復挂冠
機心忘未得碁局與魚竿

九日落星山登高

秋暮天高稻穗成
落星山上會諸賓
黃花汎酒依流俗
白髮滿頭思古人
巖影晚看雲出岫
湖光遙見客垂綸
風煙不改年長度
終待林泉老此身

送蕭尚書致仕歸廬陵

江湖分飛二十春
重論前事不堪聞
主憂臣辱誰非我
曲突徙薪唯有君
金紫滿身皆外物
雪霜垂領便離羣
鶴歸華表望不盡
玉筍山頭多白雲

秋日汎舟賦蘋花

素艷擁行舟
清香覆碧流
遙煙分的的
輕浪汎悠悠
雨歇

平湖滿風涼，連瀆秋今朝。流詠處，卽是白蘋洲。

禁中新月

今夕拜新月，沉沉禁署中。玉繩疎間彩，金掌靜無風。節換知身老，時平見歲功。吟看北墀暝，蘭燼墜微紅。

送德邁道人之豫章

禪靈橋畔落殘花，橋上離情對日斜。顧我乘軒慙組綬，羨師飛錫指煙霞。樓中西嶺真君宅，門外南州處士家。莫道空談便無事，碧雲詩思更無涯。

送陳祕監歸泉州

風滿潮溝木葉飛，水邊行客駐騾騑。三朝恩澤馮唐老，萬里鄉關賀監歸。世路窮通前事遠，半生談笑此心違。離歌

不識高堂慶特地令人淚滿衣

又聽霓裳羽衣曲送陳君

清商一曲遠人行桃葉津頭月正明此是開元太平曲莫
教偏作別離聲

徐 鉉

鉉字楚金廣陵人鉉之弟南唐時爲屯田郎中知
制誥集賢殿學士有集

送程德琳郎中學士

瓜步妖氛滅岷岡草樹青終朝空望極今日送君行報政
秋雲靜微吟晚月生樓中長可見特用減離情

太傅相公以東觀庭梅西垣舊植昔陪盛賞今獨家

兄唱和之餘俾令攀和輒依本韻伏愧斐然

靜對含章樹閑思共有時香隨荀令在根異武昌移物性
雖搖落人心豈變衰唱酬勝笛曲來往韻朱絲

太傅相公與家兄梅花調唱許綴末篇再賜新詩俯
光拙句謹奉清韻用感鈞私伏惟采覽

重歎梅花落非關塞笛悲論文叨接莠末曲愧吹簫枝逐
清風動香因白雪知陶鈞敷左悌更賦邵公詩

同家兄哭喬侍郎

諸公長者鄭當時事事無心性坦夷但是登臨皆有作未
嘗相見不伸眉生前適意無過酒身後遺言只要詩三日
笑談成理命一篇投弔尙應知

秋詞

井梧紛墮砌寒雁遠橫空雨久萼苔紫霜濃薜荔紅

陳沆

沆南唐時廬阜處士

嘲廬山道士

嚼肉先生欲上昇黃雲踏破紫雲崩龍腰鶴背無多力傳
與麻姑借大鵬

孫覲

覲字文山南康人官郎中

送鍾員外

賦

萬物中瀟灑修篁獨逸羣貞姿曾冒雪高節欲凌雲細韻

風初發濃烟日正曛回題偏情別不可暫無君

廖融

融字元素處化人卜隱南岳與逸人任鵠凌巘王
正已王元共結詩社自號衡山居士

謝翁宏以詩百篇見示

高竒一百篇造化見工全積思遊滄海冥搜入洞天神珠
迷罔象端玉匪雕鐫休嘆不得力離騷千古傳

贈天台逸人

移檜托禪子攜家上赤城拂琴天籟寂欹枕海濤生雲白
寒峰晚鳥歌春谷晴又聞求桂櫂載月十洲行

古檜

何人見植初老樹梵王居山鬼暗棲托樵夫難破除聲高
秋漢迥影倒月潭虛盡日無僧倚清風長有餘

題伍彬屋壁

圓塘綠水平魚躍紫萼生要路貧無力深村老退耕犢隨
原草遠蛙傍塹籬鳴撥櫂茶川去初逢穀雨晴

夢仙謠

琪木扶疎繫辟邪麻姑夜宴紫皇家銀河旌節搖波影珠
閣笙簫吸月華翠鳳引遊三島路赤龍齊駕五雲車星稀
猶倚虹橋立擬就張騫搭漢槎

退宮妓

神仙風格本難儔曾從前皇翠輦遊紅躑躅繁金殿暖碧

芙蓉笑水宮秋寶鏡金
剝陰崖覆錦帳香清畫燭幽
一月色衰歸故里月明猶夢按梁州

曾庚幾

庚幾吉州人

放猿

孤猿鎖檻歲年深放出城南百丈林
綠水任從聯臂飲青山不用斷腸吟

胡

玠一作胡玠

玠隱廬山苦心五言李騰廉問江西弓旌不至人惜之

巢燕

燕來巢我簷我屋非高大所貴兒童善保爾無殃禍莫巢
孀婦家孀婦怨孤坐妬爾長雙飛打爾危巢破

廬山桑落洲

莫問桑田事但看桑落洲數家新住處昔日大江流古岸
崩欲盡平沙長未休想應百年後人世更悠悠

石楠樹

本自清江石上生移栽此處稱閑情青雲士盡識珍木白
屋人多喚俗名重布綠陰滋蘚色深藏好鳥引雛聲余今
一日千迴看每度看來眼益明

江西詩徵卷四